

Streektaaldag in Nörden, 6.11.1999:

De Keerlke-Pries 1999 geiht an Garrelt van Borssum!

Laudatio van Dr. Dirk Gerdes, RPZ Auerk, OL

Geachte Damen un Heren, leve Frünnen!

De oostfreeske Oscar, uns Keerlke-Pries, is weer to vergeven. Elk un een wacht nu, dat de Naam up d' Tafel kummt. Ik mutt daarför sörgen, dat Ji vördeem noch 'n bietje tohört, daarom segg ik de Naam noch nich.

In Oostfreesland giff dat, buten de Uttekens van de Oostfreeske Landskupp, noch twee groot Kulturpriesen, de hier för de Minsken blot ut Oostfreesland stift worden sünd: de „**Keerlke**“ un de **Hans-Beutz-Stiftungspries**, de güstern an Hans-Jürgen Tabel van de Ländliche Akademie Krummhörn vergeven worden is. Glückwunsk nochmal van disse Stee an Hans-Jürgen Tabel: he hett völ för uns Streektaal un de Minsken in Oostfreesland daan.

De Priesdrager van güstern un de Priesdrager van vandaag hebben mi to 't Nadenken brocht:

Beid' sünd Lü, de de Saak över hör Person stellt un de in d'Achtergrund bleibt, wenn de Presse an 't Fotograferen is. Se sünd Teamarbeiters in en Kuntrei, waar besünner Lü mit besünner Ideen **allennig** upsmeten sünd un blot as Privatünnernehmens wiederkoomt of sük dörsetten köönt. (Wat sünd de Lü bit in de höchste Instanzen över de Ingenieur Wobben hertrucken, as ENERCON noch 'n lütten Warkstee weer!)

De Teamarbeiters hört de Tokummst - dat weet wi all, un dat kann een överall lesen.

Man wenn ik mi so de Priesdragers in Oostfreesland ankiek, denn bewunner ik immer weer de Gedür, de lang Aam, van disse Minsken! Ik fraag mi denn, of dat in Oostfreesland nich to lang dürt, bit dat en besünner Minske maal de Anerkennen kriggt, de hüm as Person tosteiht.

Wi hebben - so meen ik - kien „politischen Kultur“, de jung Lü Mood maakt, wat Besünners to wagen: Wovöl jung Lü gaht van Oostfreesland weg un koomt nich weer torügg, umdat hier noch to faken de Sprök ut de fievtiger Jahren gellen deiht: „*Keine Experimente*“? Un to disse Kultur hört denn ok de Instellen: „*Blot nich upfallen!*“

Oostfreesen sünd good Teamarbeiters! Daar kunnen wi wied mit komen, wenn wi disse Begabung koppeln deen mit Neeisgier un Anerkennen för enkelte besünner Lü.

De Keerlke-Pries un ok de Hans-Beutz-Stiftungspries haalt sükse besünner Lü an 't Lucht. Upmaal sücht 'n denn Biller in d' Zeitung van Minsken, de daar nich elke Dag to sehn sünd.

De Priesen willt Mood maken, sükse Lü fakerder na vörn to halen, sükse Lü mehr to stönen.

Un wenn daarför anner Lü nich so faken in d' Zeitung staht, denn kunn'n villicht en Gefühl daarför kriegen, dat Oostfreesland in Wahrheit en heel lebennigen Region is!

Wo anners lett sük dat verklaren, wenn bi de Wettstried „*Ideen aus der Region für die Region*“, de en Ollenbörger Bank in ganz Weser-Ems dörföhrt hett, ut Oostfreesland haast sovöl Ideen instürt worden sünd as ut all anner Kuntreien tosamen?

Vör sovöl Kreativität un Interess moot wi doch nich bang wesen! Daar moot doch nich de Deckel up! Warum hett en Bank ut Ollenbörg un nich de Strukturkonferenz Ostfreesland so'n Wettstried dörföhrt?

Laat uns vandaag een na vörn halen, de dit Jahr sien 50. Geburtsdag fiert hett un anto 20 Jahr an mennig Steden för Plattdütsk un uns Regionalkultur warkt hett.

De al in de 80er Jahren een van de wichtigste Mitarbeiters in de Modellversök „*MOBiLe*“ („*Museen Ostfrieslands als Bildungsstätten und Lernorte*“) west is. De in dat *Pilotprojekt* „*Plattdütsk in de School*“ mit daarför sörgt hett, dat dat Schipp unner

dat Leid van en anner Mester (de sük vandaag daarmit mooimaakt) nich up de Grund leep, ok wenn dat haast sien Gesundheit köst harr.

Een, de in sien Bibliothek **un in sien Kopp** (!) woll jede Book hett, dat in de lesde twintig Jahr un mehr in Oostfreesland un över Oostfreesland rutkamen is. De de Mesterkring in Oostfreesland an 't Lopen hollt. De bi Oostfreeske Taal ok noch in de Vörstand mitwarkt hett. De nu siet 'n paar Maanten **de eerste Fackberader för Plattdütsk in d' School bi de Bezirksregeren** is. De ut Leer kummt un

Garrelt van Borssum

heet. De kriggt de Keerlke 1999!

Besten Dank för 't Tohören.